



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ
ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ

ք. Երևան

03.12.2018թ.

Ո Ր Ո Շ ՈՒ Մ

ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ

թիվ ԳԲԽ-ԷՍ-2018/113

ՀՀ գնումների հետ կապված բողոքներ քննող անձը (այսուհետ՝ նաև Բողոքներ քննող անձ)՝ քննելով «ԷԼԿՈՄՊ» ՍՊԸ-ի (այսուհետ՝ նաև Ընկերություն) կողմից 14.11.2018թ. ներկայացրած բողոքը (այսուհետ՝ նաև Բողոք) և կից փաստաթղթերը, պարզեց հետևյալը.

1. «ԷԼԿՈՄՊ» ՍՊԸ-ի ներկայացրած փաստերը, հիմնավորումները և պահանջը.

«ԷԼԿՈՄՊ» ՍՊԸ-ն 14.11.2018թ. Բողոքներ քննող անձին ներկայացրած բողոքով հայտնել է հետևյալը.

«ՀՀ Ֆինանսների նախարարության գնումների համակարգում (www.gnumner.am) 26.10.2018թ. հրապարակվել է «Հայաստանի պետական տնտեսագիտական համալսարան» ՊՈԱԿ-ի կարիքների համար «Տեսահսկման համակարգի» ձեռքբերման նպատակով հայտարարված ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման ընթացակարգի հայտարարություն և հրավեր մինչև 02.11.2018թ. ներառյալ:

Ընթացակարգին մասնակցելու նպատակով ի թիվս այլ կազմակերպությունների հայտ է ներկայացրել նաև «ԷԼԿՈՄՊ» ՍՊԸ-ն (այսուհետ՝ նաև Ընկերություն):

«ԷԼԿՈՄՊ» ՍՊԸ-ի կողմից պայմանագրի կատարման համար նախատեսված ընդհանուր գինը կազմում է 1.399.500 ՀՀ դրամ (ներառյալ ԱԱՀ):

Ընթացակարգի գնահատող հանձնաժողովի 05.11.2018թ. ժամը 12:00-ին կայացած նիստի թիվ 3 արձանագրության համաձայն՝ առաջին տեղ զբաղեցրած մասնակից է ճանաչվել «ԷԼԿՈՄՊ» ՍՊԸ-ն:

Նույն արձանագրության համաձայն՝ հանձնաժողովը որոշել է առաջին տեղ զբաղեցրած մասնակիցների մասով հարցում ներկայացնել ՀՀ պետական եկամուտների կոմիտե (այսուհետ՝ Կոմիտե)՝ ՀՀ պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորություններ ունենալու կամ չունենալու վերաբերյալ:

Կոմիտեի կողմից տրված եզրակացության համաձայն՝ Ընկերությունը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի «Գնումների մասին» ՀՀ օրենքի (այսուհետ՝ Օրենք) 6-րդ հոդվածով նախատեսված շեմը գերազանցող հարկային պարտավորություններ, թետեպ չի նշվել, ժամկետանց պարտավորությունները, որ հարկման տեսակից է գոյացել և արդյոք այն համաձայն ՀՀ Հարկային օրենսգրքի հարկի տեսակ է հանդիսանում:

Վերոգրյալով պայմանավորված՝ հանձնաժողովը որոշել է մերժել Ընկերության հայտը:

«ԷԼԿՈՄՊ» ՍՊԸ-ն համաձայն չէ վերը նշված որոշման և Կոմիտեի եզրակացության հետ, քանի որ ՀՀ պետական եկամուտների կոմիտեի նախագահի 11.04.2018թ. թիվ 245-Ա հրամանով սահմանված հավելվածի՝ «Հարկ վճարողի անձնական հաշվի քարտի» քաղվածքի 03.11.2018թ. դրությամբ «ԷԼԿՈՄՊ» ՍՊԸ-ի հարկային մարմնի կողմից վերահսկվող եկամուտների գծով պարտավորությունների, դեբետային գումարների, սահմանված չափից ավել վճարված գումարների, միասնական հաշվում առկա գումարների, հարկային մարմնի տեղեկատվական բազայում առկա տեղեկությունների հիման վրա պաշտոնական քաղվածքի համաձայն՝ Ընկերությունն ընդհանրապես չի ունեցել հարկային պարտավորություններ:

Ընկերությունը, հիմք ընդունելով վերոհիշյալ պաշտոնական քաղվածքից վերցված տվյալները և համոզված լինելով, որ «ԷԼԿՈՄՊ» ՍՊԸ-ի հարկային պարտավորությունների չափը՝ տվյալ իրադրությունում չի ունեցել ժամկետանց պարտավորություններ, չի գերազանցում Օրենքի 6-րդ հոդվածի 1-ին մասի 2-րդ կետով նախատեսված շեմը, հայտ է ներկայացրել և մասնակցել Ընթացակարգին:

Սակայն, ի զարմանս Ընկերության, պարզվել է, որ Ընկերությունը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ժամկետանց պարտավորություններ:

Ցանկանում եմ ավելացնել նաև, որ Ընկերության պարտքը փաստացի դրոշմանիշային վճարների գծով է, որը գոյացել է 2017թ. փետրվարից՝ 17 ամսվա կտրվածքով ընկերության աշխատակիցների հանրագումարով նախատեսված ընդհանուր գումարից յուրաքանչյուր ամիս 1000 ՀՀ դրամ քիչ վճարելու հանգամանքով ինչը դրոշմանիշային վճարների գծով կանոնակարգի ոչ լիարժեք՝ թերի լինելու հանգամանքով է եղել պայմանավորված: Մինչույն ժամանակ դրոշմանիշային վճարները մինչև վերջին ժամանակներս չեն դիտարկվել ՀՀ պետական եկամուտների կոմիտեի կողմից վերահսկվող հարկային պարտավորություններ:

Հայտնում եմ, որ Ընկերությունը բավարարում է Օրենքի 6-րդ հոդվածի 1-ին մասի 2-րդ կերտով սահմանված պահանջները, քանի որ տվյալ պարագայում, Ընկերությունը Ընթացակարգի արդյունքում՝ նվազագույն գնային առաջարկ ներկայացնելու պայմաններում ճանաչվել է առաջին տեղ զբաղեցրած մասնակից, սակայն Կոմիտեի կողմից տրված եզրակացության պատճառով զրկվել է պայմանագիր կնքելու հնարավորությունից, դրանով իսկ մեկուսացվելով պայմանագրի կողմ հանդիսանանլուց:»:

«ԷԼԿՈՄՊ» ՍՊԸ-ն Բողոքներ քննող անձին ներկայացված բողոքով խնդրել է.

Պարտավորեցնել ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման մրցույթի գնահատող հանձնաժողովին «ԷԼԿՈՄՊ» ՍՊԸ-ի կողմից ներկայացված հայտը գնահատել բավարար և վերականգնել ընկերության ոտնահարված իրավունքը՝ կնքելով «Տեսահսկման համակարգի» ձեռքբերման պայմանագիր:

Բողոքներ քննող անձի կողմից հրավիրված նիստերին մասնակցում էր «ԷԼԿՈՄՊ» ՍՊԸ-ի տնօրեն Արմենակ Հովսեփյանը:

2. «Հայաստանի պետական տնտեսագիտական համալսարան» ՊՈԱԿ-ի կողմից բողոքի վերաբերյալ ներկայացված փաստերը, հիմնավորումները և դիրքորոշումը.

Ղեկավարվելով «Գնումների մասին» ՀՀ օրենքի 50-րդ հոդվածի 4-րդ մասով՝ Բողոքներ քննող անձը 15.11.2018թ. գրությամբ դիմել է «Հայաստանի պետական տնտեսագիտական համալսարան» ՊՈԱԿ-ին՝ խնդրելով բողոքի վերաբերյալ որոշում կայացնելու նպատակով, նույն հոդվածով սահմանված ժամկետում Բողոքներ քննող անձին

տրամադրել գրավոր դիրքորոշում, սակայն վերջինիս կողմից որևէ դիրքորոշում չի ներկայացվել:

«Հայաստանի պետական տնտեսագիտական համալսարան» ՊՈԱԿ-ը պատշաճ ծանուցվել է Բողոքներ քննող անձի կողմից հրավիրված նիստերի ժամանակացույցի վերաբերյալ, սակայն ՊՈԱԿ-ի կողմից լիազորված որևէ ներկայացուցիչ չի ներկայացել:

3. ԳԲԽ-ԷՍ-2018/113 բողոքի քննության համար էական նշանակություն ունեցող փաստերը, Բողոքներ քննող անձի հիմնավորումները և եզրահանգումը.

Բողոքներ քննող անձն ուսումնասիրել է «ԷԼԿՈՄՊ» ՍՊԸ-ի (այսուհետ՝ նաև Ընկերություն) կողմից 14.11.2018թ ներկայացրած բողոքը և կից փաստաթղթերը, ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման հրավերը (այսուհետ՝ նաև Հրավեր) ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման հանձնաժողովի (այսուհետ՝ նաև Հանձնաժողով) 05.11.2018թ. ժամը 12:00-ին կայացած նիստի թիվ 3 և 08.11.2018թ. ժամը 11:00-ին կայացած նիստի թիվ 4 արձանագրությունները, 03.11.2018թ. դրությամբ Ընկերության՝ «Հարկ վճարողի անձնական հաշվի քարտի» քաղվածքը, ՀՀ պետական եկամուտների կոմիտեի կողմից 20.11.2018թ. «ԷԼԿՈՄՊ» ՍՊԸ-ին տրված թիվ 3091 տեղեկանքը, Ընկերության կողմից Ընթացակարգին ներկայացված մասնակցության հայտի պատճենը, ՀՀ պետական եկամուտների կոմիտեի կողմից 08.11.2018թ. տրված եզրակացությունը.

«Հայաստանի պետական տնտեսագիտական համալսարան» ՊՈԱԿ-ի կարիքների համար՝ տեսահսկման համակարգի ձեռքբերման նպատակով հայտարարվել է ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցում, (այսուհետ նաև՝ Ընթացակարգ) որին մասնակցության հայտ է ներկայացրել նաև «ԷԼԿՈՄՊ» ՍՊԸ-ն:

Ընկերության կողմից առաջարկված գնային առաջարկը կազմել է 1.399.500 ՀՀ դրամ:

Ընկերությունը Ընթացակարգին մասնակցելու նպատակով ներկայացված հայտի N 2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին համապատասխանելու մասին հայտարարությամբ, հայտարարել և հավաստել է, որ բավարարում ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման հրավերով սահմանված մասնակցության իրավունքի պահանջներին:

Հանձնաժողովը 05.11.2018թ. ժամը 12:00-ին կայացած նիստի թիվ 3 արձանագրությամբ որոշել է Ընթացակարգի առաջին տեղ զբաղեցրած մասնակից ճանաչել «ԷԼԿՈՄՊ» ՍՊԸ-ին:

ՀՀ պետական եկամուտների կոմիտեի կողմից 08.11.2018թ. տրամադրած եզրացության համաձայն՝ «ԷԼԿՈՄՊ» ՍՊԸ-ն հարկային մարմնի կողմից վերահսկվող եկամուտների գծով ունի ժամկետանց պարտավորություն՝ 17.000 ՀՀ դրամ գումարի չափով:

Հանձնաժողովը 08.11.2018թ. ժամը 11:00-ին կայացած նիստի թիվ 4 արձանագրության.

- 1-ին կետով արձանագրել է, որ «ԷԼԿՈՄՊ» ՍՊԸ-ն ՀՀ պետական եկամուտների կոմիտեի կողմից 08.11.2018թ. տրամադրած եզրակացության համաձայն՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի է ժամկետանց հարկային պարտավորություն:

- 2-րդ կետով հիմք ընդունելով «Գնումների մասին» ՀՀ օրենքի 6-րդ հոդվածի 1-ին մասի 2-րդ կետը, որոշել է «ԷԼԿՈՄՊ» ՍՊԸ-ի կողմից ներկայացված հայտը մերժել:

Բողոքի քննության նպատակով կայացած նիստի ժամանակ «ԷԼԿՈՄՊ» ՍՊԸ-ի ներկայացուցիչը՝ Բողոքներ քննող անձին հայտնեց, որ ՀՊՏՀ-ԳՀԱՊԶԲ-18/ՏՀ-1 ծածկագրով գնանշման հարցման ընթացակարգի գնահատող հանձնաժողովն արձանագրել է, որ ՀՀ պետական եկամուտների կոմիտեի կողմից 08.11.2018թ. տրամադրած եզրակացության համաձայն՝ «ԷԼԿՈՄՊ» ՍՊԸ-ն հայտը ներկայացնելու օրվա դրությամբ (03.11.2018թ.) ունի հարկային մարմնի կողմից վերահսկվող եկամուտների գծով ժամկետանց պարտավորություն՝ 17.000 ՀՀ դրամ գումարի չափով, մինչդեռ Ընկերության «Հարկ վճարողի անձնական հաշվի քարտի» քաղվածքի համաձայն՝ «ԷԼԿՈՄՊ» ՍՊԸ-ն՝ հայտը ներկայացնելու օրվա (03.11.2018թ.) դրությամբ հարկային մարմինների կողմից վերահսկվող եկամուտների գծով պարտավորություններ չունի, հետևաբար հիմք ընդունելով «Հարկ վճարողի անձնական հաշվի քարտի» տվյալները և վստահ լինելով, որ ՀՀ պետական բյուջեի նկատմամբ պարտավորություններ չունի, Ընկերությունը մասնակցության հայտ է ներկայացրել:

Միաժամանակ Ընկերության ներկայացուցիչը Բողոքներ քննող անձին ներկայացրեց հարկային մարմնի կողմից վերահսկվող եկամուտների գծով պարտավորությունների վերաբերյալ «Հարկ վճարողի անձնական հաշվի քարտի» 03.11.2018թ. դրությամբ քաղվածքը, որի համաձայն Ընկերությունը հարկային մարմնի կողմից վերահսկվող

եկամուտների գծով պարտավորություններ չունի, ինչպես նաև ՀՀ պետական եկամուտների կոմիտեի կողմից 20.11.2018թ. «ԷԼԿՈՄՊ» ՍՊԸ-ին տրված թիվ 3091 տեղեկանքը, որի համաձայն արձանագրված պարտավորությունը դրոշմանիշային վճարների գծով է:

ՀՀ ԿԱ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանված են վերահսկվող եկամուտների գծով պարտավորությունների հետևյալ հարկատեսակները՝ ԱԱՀ, շահութահարկ. եկամտային հարկ, ակցիզային հարկ, շրջանառության հարկ, արտոնագրային հարկ, բնապահպանական հարկ, ոչ ռեզիդենտի շահութահարկ, սոցիալական վճար, պետական տուրք, բնօգտագործման վճար, այլ հարկային եկամուտներ:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի՝

- 32-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին.

- 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը.

- 44-րդ կետի համաձայն՝ կոմիտեն նույն կարգի 43-րդ կետի 3-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին տեղեկատվություն: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց

պարտավորություններ կամ չի բավարարում հրավերով «Ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից:

«Հայաստանի պետական տնտեսագիտական համալսարան» ՊՈԱԿ-ի կարիքների համար՝ «տեսահսկման համակարգի» ձեռքբերման նպատակով հայտարարված ՀՊՏՀ-ԳՀԱՊՁԲ-18/ՏՀ-1 ծածկագրով գնանշման հարցման ընթացակարգի հրավերի 1-ին մասի՝

• 7.12 կետի 3-րդ ենթակետի համաձայն՝ Հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղ զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև սույն հրավերի 1-ին մասի 2.5 կետով նախատեսված՝ «Ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը: Ընդ որում նույն ենթակետում հարցումն ուղարկվում է Lena_Najaryan@taxservice.am էլեկտրոնային փոստի հասցեին նույն հրավերի 8-րդ հավելվածով նախատեսված ձևին համապատասխան՝ էլեկտրոնային նամակի պատճենները միաժամանակ ուղարկելով karine_sargsyan@taxservice.am, gor_mkrtchyan@taxservice.am և procurement@minfin.am էլեկտրոնային փոստի հասցեներին:

• 7.14 կետի համաձայն՝ կոմիտեն նույն հրավերի 1-ին մասի 7.12 կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով պատվիրատուին տրամադրում է հարցման մասին սույն հրավերի 3-րդ հավելվածով նախատեսված ձևին համապատասխան տեղեկատվություն: Նույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են

իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղ զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է Օրենքով նախատեսված շեմը գերազանցող ժամկետանց պարտավորություններ կամ չի բավարարում սույն հրավերով «ֆինանսական միջոցներ» որակավորման չափանիշի պահանջներին և պայմանագիրը կնքված չէ, ապա տվյալ մասնակցի հայտը մեժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրված տեղեկատվությունից տարբերվող տեղեկատվություն ներկայացվելու հանգամանքից:

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

Բողոքներ քննող անձն արձանագրում է, որ.

- ՀՀ պետական եկամուտների կոմիտեի կողմից 08.11.2018թ. Հանձնաժողովին ներկայացրած եզրակացության համաձայն՝ «ԷԼԿՈՄՊ» ՍՊԸ-ի ընթացակարգին մասնակցելու նպատակով հայտը ներկայացնելու օրվա (03.11.2018թ.) դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների գումարը կազմել է 17.000 ՀՀ դրամ:

- «ԷԼԿՈՄՊ» ՍՊԸ-ի հարկային մարմնի կողմից վերահսկվող եկամուտների գծով ժամկետանց պարտավորությունը առաջացել է «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշայինի վճարների գծով:

- ՀՀ ԿԱ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանվել են վերահսկվող եկամուտների գծով պարտավորությունների վերաբերյալ տրվող տեղեկանքի ձևը, որտեղ՝ «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝

վճարման ենթակա դրոշմանիշայինի վճարը որպես հարկային մարմնի կողմից վերահսկվող եկամուտների գծով պարտավորություն, նախատեսված չէ:

- «ԷԼԿՈՄՊ» ՍՊԸ-ն հայտը ներակայացնելու օրը առաջնորդվել է Ընկերության «Հարկ վճարողի անձնական հաշվի քարտի» տվյալներում առկա տեղեկատվությամբ, որի համաձայն՝ «ԷԼԿՈՄՊ» ՍՊԸ-ի՝ հայտը ներակայացնելու օրվա (03.11.2018թ.) դրությամբ հարկային մարմինների կողմից վերահսկվող եկամուտների գծով որևէ պարտավորություն առկա չէ:

Բողոքներ քննող անձը գտնում է, որ «ԷԼԿՈՄՊ» ՍՊԸ-ի գնման գործընթացին հետագա մասնակցության դադարեցումը պայմանավորված է եղել Ընկերության իրազեկված չլինելու հանգամանքով, քանի որ Ընկերությունն արձանագրված հարկային պարտավորության առկայության վերաբերյալ տեղեկությունը կարող էր ձեռք բերել բացառապես Ընկերության՝ հարկ վճարողի անձնական հաշվի քարտի քաղվածքի տվյալներում առկա տեղեկատվությունից:

Բողոքներ քննող անձը գտնում է նաև, որ տվյալ դեպքում արձանագրված պարտավորությունը չի կարող դիտարկվել «ԷԼԿՈՄՊ» ՍՊԸ-ի՝ հայտը ներակայացնելու օրվա (03.11.2018թ.) դրությամբ հարկային մարմինների կողմից վերահսկվող եկամուտների գծով ժամկետանց պարտավորություն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 1-ին կետի «բ» ենթակետով՝ ՀՀ գնումների հետ կապված բողոքներ քննող անձը

Ո Ր Ո Շ Ե Ց

1. «ԷԼԿՈՄՊ» ՍՊԸ-ի կողմից 14.11.2018թ ներկայացրած բողոքը բավարարել մասնակի:

2. Պարտավորեցնել ՀՊՏՀ-ԳՀԱՊԶԲ-18/ՏՀ-1 ծածկագրով գնանշման հարցման մրցույթի գնահատող հանձնաժողովին ընդունել՝ «ԷԼԿՈՄՊ» ՍՊԸ-ի կողմից ներկայացված հայտը 08.11.2018թ. ժամը 11:00-ին կայացած նիստի N 4 արձանագրության 2-րդ կետով մերժելու մասին որոշումը դադարեցնելու մասին համապատասխան որոշում:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի ընդունած որոշումն ուժի մեջ է
մտնում այն տեղեկագրում հրապարակելուն հաջորդող օրը:

ՀՀ գնումների հետ կապված
բողոքներ քննող անձ՝

S. Seleznev

ԷՄԻԼ ՍԱՐԳՍՅԱՆ